

Հավելված
ՀՀ կառավարության 2014 թվականի
հունվարի 9-ի N 4 - Ն որոշման

Կ Ա Ր Գ

ԻՐԱՎԱԿԱՆ ՕԺԱՆԴԱԿՈՒԹՅԱՆ ՏՐԱՄԱԴՐՄԱՆ

I. ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգով սահմանվում է հոգեբուժական կազմակերպությունում բուժվող՝ հոգեկան խանգարումներ ունեցող անձին իրավական օժանդակություն (այսուհետ՝ իրավական օժանդակություն) տրամադրելու ընթացակարգը:

2. Իրավական օժանդակությունը ներառում է «Փաստաբանության մասին» Հայաստանի Հանրապետության օրենքի 41-րդ հոդվածի 2-րդ մասով նախատեսված անվճար իրավաբանական օգնությունը, այդ թվում՝ նաև հոգեբուժական կազմակերպությունում գտնվելու և բուժման հետ կապված հարցերի, հոգեկան խանգարումներ ունեցող անձի (այսուհետ՝ անձ) իրավունքների և պարտականությունների վերաբերյալ խորհրդատվությունը:

II. ԻՐԱՎԱԿԱՆ ՕԺԱՆԴԱԿՈՒԹՅԱՆ ՏՐԱՄԱԴՐՄԱՆ ՀԱՄԱՐ ԳԻՄԵԼԸ

3. Իրավական օժանդակությունը տրամադրվում է անձի կամ նրա օրինական ներկայացուցչի դիմումի հիման վրա՝ Հայաստանի Հանրապետության փաստաբանների պալատի հանրային պաշտպանի գրասենյակի (այսուհետ՝ հանրային պաշտպանի գրասենյակ) նշանակած փաստաբանի կողմից:

4. Անձը կամ նրա օրինական ներկայացուցիչը հանրային պաշտպանի գրասենյակի ղեկավարին հասցեագրված՝ իրավական օժանդակության տրամադրման մասին դիմումն անձամբ, փոստով կամ հոգեբուժական կազմակերպության վարչակազմի միջոցով ներկայացնում է հանրային պաշտպանի գրասենյակ:

5. Դիմումին կցվում է անձի՝ հոգեբուժական կազմակերպությունում բուժում անցնելու մասին տեղեկանք: Հոգեբուժական կազմակերպությունը նշված տեղեկանքը, անձի կամ նրա օրինական ներկայացուցչի պահանջով, անմիջապես տրամադրում է նրանց, իսկ եթե սույն կետով նախատեսված դիմումն ուղարկվելու է հոգեբուժական կազմակերպության միջոցով, տեղեկանքը կցում է դիմումին:

6. Հոգեբուժական կազմակերպությունը սույն կարգի 4-րդ կետով նախատեսված դիմումն ստանալուն պես, բայց ոչ ուշ, քան հաջորդ օրը, պատվիրված նամակով ուղարկում է հանրային պաշտպանի գրասենյակ:

7. Սույն կարգի 4-րդ կետով նախատեսված դիմումը հոգեբուժական կազմակերպության միջոցով հասցեատիրոջն ուղարկելու ծախսերը հոգում է հոգեբուժական կազմակերպությունը:

III. ԻՐԱՎԱԿԱՆ ՕԺԱՆԴԱԿՈՒԹՅԱՆ ՏՐԱՄԱԴՐՈՒՄԸ

8. Հանրային պաշտպանի գրասենյակի ղեկավարը սույն կարգի 4-րդ կետով նախատեսված դիմումն ստանալուն պես, բայց ոչ ուշ, քան հաջորդ օրը, ընդունում է

որոշում դիմումը բավարարելու և գործը հանրային պաշտպանին հանձնելու մասին՝ բացառությամբ սույն կարգի 9-րդ կետով նախատեսված դեպքերի:

9. Հանրային պաշտպանի գրասենյակի ղեկավարը սույն կարգի 4-րդ կետով նախատեսված դիմումը մերժում է միայն «Փաստաբանության մասին» Հայաստանի Հանրապետության օրենքի 41-րդ հոդվածի 6-րդ մասով նախատեսված հիմքով:

10. Հանրային պաշտպանը գործն ստանալուն պես, բայց ոչ ուշ, քան հաջորդ օրը, պարտավոր է տեսակցել անձին կամ նրա օրինական ներկայացուցչին:

11. Հիվանդանոցի վարչակազմն ապահովում է հանրային պաշտպանի անարգել մուտքն ու ելքը հիվանդանոցի՝ տեսակցության համար նախատեսված տարածք, ինչպես նաև՝ անձի և հանրային պաշտպանի մեկուսի տեսակցությունը՝ հաշվի առնելով տվյալ հոգեբուժական կազմակերպության տնօրենի հաստատած ներհիվանդանոցային ռեժիմը:

IV. ԻՐԱՎԱԿԱՆ ՕԺԱՆԴԱԿՈՒԹՅԱՆ ՏՐԱՄԱԴՐՈՒՄԸ
ԴԱԴԱՐԵՑՆԵԼՈՒ ՀԻՄՔԵՐԸ

12. Իրավական օժանդակության տրամադրումը դադարեցվում է հանրային պաշտպանի գրասենյակի ղեկավարի որոշմամբ՝

- 1) անձի կամ նրա օրինական ներկայացուցչի դիմումի հիման վրա.
- 2) եթե անձը դուրս է գրվել հոգեբուժական կազմակերպությունից:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԿԱՌԱՎԱՐՈՒԹՅԱՆ ԱՇԽԱՏԱԿԱԶՄԻ
ՂԵԿԱՎԱՐ-ՆԱԽԱՐԱՐ

Վ. ԳԱՐՐԻԵԼՅԱՆ